


REPUBLIKA Y'UBURUNDI



IBIRO VY'UMUKURU W'IGHUGU

IJAMBO NYENICUBAHIRO

PETERO NKURUNZIZA

UMUKURU W'IGHUGU ASHIKIRIJE ABARUNDI

KU MUSI WAHARIWE UBUMWE BW'ABARUNDI.

BUJUMBURA, 04 RUHUMA 2010.

**Barundi, Barundikazi,
Ncuti z'Uburundi,**

1. Tubanje gushimira Imana Mushoboravyose yo yazigamye Uburundi ikabushitsa kuri uyu munsi.
2. Buca duhimbaza imyaka icumi n'icenda (19) irangiye, abarundi dupfunditse amasezerano yo kubana mu bumwe bwacu. Uyu munsi tukawuhimbaza twibuka ko **Ubumwe ari yo nkingi y'amahoro, umutekano, demokarasi n'iterambere** ». Kukaba nkako, hari kw'igenekerezzo rya gatanu Ruhuhuma, umwaka w'i 1991, aho hemezwa amasezerano y'ubumwe bw'abarundi.
3. Ariko ntivyoroheye abarundi kuyabumbatira bikwiye. Ivyo bikaba vyavuye ku karwi k'inkorabara katemeye iryo abanyagihugu bari bahejeje gupfundika mu matora yo mu mwaka w'i 1993, kagandagura umukuru w'ighihu Nyenicubahiro NDADAYE Melchior n'indongozi zitari nke, abanyagihugu baca basubiranamwo, ibere riba rirayaze.
4. Ubwicanyi, uguturatzwa kw'abenegihugu n'intambara vyakurikiye, vyarasinzikaje abarundi, ubumwe buratosekara, naho hari abarundi bakingiye abo badasangiyе ubwoko.
5. Ivyo vyaragaragaje ko ubumwe atari ubwo kuronderera mu bwoko gusa, ahubwo buri no mu kwubahiriza ikivuye mu matora. Iyo ni inyigisho abarundi dukwiye gufata nka nkama, tukirinda kuvuguruza abanyagihugu.

**Barundi, Barundikazi,
Ncuti z'Uburundi,**

6. Abarundi n'amakungu ntibahengeshanije kurondera ingene ubumwe bw'abarundi bwosubira gutsimbatara, kuko twibutse ko aribwo **nkingi y'amahoro, umutekano, demokarasi n'iterambere**.

Harabaye ibiganiro vy'urutavanako, vyadushikanye ku masezerano y'i Arusha ku wa 28 Myandagaro umwaka w'i 2000, hamwe n'amasezerano yo guhagarika intambara yabaye hagati ya Leta n'imirwi barwana, gurtyo hagaruka umwumvikano n'ukwizerana mu Barundi.

7. Ivyo biheze, twaciye twihutira gutangura gutunganya inzego nshasha z'umutekano kugira zibe isemo n'inkingi nyakuri abarundi babonamwo ishusho, icirore c'ubumwe bw'abarundi. Ni inzego rero twarense turushe, zavuye kure, ni izo kubandanya dutunganya neza kandi dushigikira. Uwo wese rero yoza arondera gucanishamwo abazigize canke guhungabanya uko zikora, abarundi tuzomwamirira kure, ateshwe ate, kuko ataho yoba atandukaniye n'umwansi w'ubumwe bwacu.
8. N'ubu umugambi wo kunywanisha abarundi ngo bagumane ubumwe, turabandanya kuwushira mu ngiro.
9. Nkako, nimba twahisemwo ibikorwa rusangi kuko bizana iterambere rivuye ku munyagihugu wenyene, rigaca rimugarukako, twashimye cane cane ko bifashaabantu b'ubwoko bwose, bo mu bisata bitandukanye guhurira ku mugambi mwiza, gurtyo bukaba ubumwe ku bikorwa, atari ubumwe mu majambo gusa. Ni vyiza rero ko ubumwe tubushigikiza ibikorwa vyiza vyo gukunda igihugu cacu.

Turashima ivyo tumaze gushikako kuva aho dutanguriye ibikorwa rusangi, kuko turavye amashure, amavuriro, inzu z'abatishoboye twubatse, tukaraba n'ingene twijukiye gukingira ibidukikije, haba mu gusukura ibisagara, gutera ibiti cane cane vy'ivyamwa, biradushimisha.

10. Ntitwagarukiye aho gusa, kuko haciye haja wa mugambi wokunywanisha abarundi mu kubaza abanyagihugu ivyo gushiraho umurwi wo kumenya ukuri no kurekuriranira. Abanyagihugu baserukiye imirwi itandukanye bakaba barashikirije aho bahagaze. Ivyo rero bigatuma akahise katubera icigwa, ivyatugoye tukabimenya, ibibi tukabihamba.

Ivyo ntibisigura ariko ko ari ukuzura akabozé kadutwaye abacu n'ivyacu.

11. Ikindi cakozwe kugira ubumwe bw'abarundi bugire aho bushimikiye, kwabaye ugufata ingingo zo kworohereza abanyagihugu mu buzima bwabo, tutaravye uwoko canke ubutunzi bw'umwe umwe. Izo nazo ni izo kwigisha ku buntu abana bose mu mashure mato mato, kuvuza ku buntu abana batarenza imyaka itanu, n'abakenyezi bibungenze.

Aho rero, yaba umuhutu, umututsi canke umutwa, umworo canke umutunzi, izo ngingo barazungukako atawukumiriwe.

12. Ibiganiro biha ijambo abarundi navyo nyene vyaje bifasha guha abarundi akaryo ko gushikiriza iryo bagona atakugonanwa, ivyo bigatuma abantu bavugana ukuri, uwunyereye bakamugarura, gurtyo ntarwe mu mutego w'amacakubiri. Iyo nayo ni ingendo yo gushigikira amahoro n'iterambere birama.

13. Ikigaragara ni uko nimba ubumwe ari yo nkingi y'amahoro, umutekano, demokarasi n'iterambere, navyo ni inkingi ~~z'~~bumwe, bikatwereka rero ko ari magiriranire.

Barundi, Barundikazi, Ncuti z'Uburundi,

14. Ubumwe bw'Abarundi buzokomera abanyagihugu bari ku bikorwa, basangira ijambo, basoneranira, bakora ibigaragaza umutima wo gukunda igihugu, tukuzuzanya mu budasa bwacu, kuko ari ubutunzi naho tutabimenye kare.

15. Ariko rero, naho dushitse ku ntambwe ishimishije, ntitwokwibagira ko twakomerekanje cane, hariho abagifise akarigangamuhogo, abataraheba ingendo za kera, abo bikigora kugendera ubumwe, urupfasoni n'ubwitonzi.

16. Ntitwosimbishwa umutima rero na bo, kuko urugendo rwo kunywanisha abarundi no kubasubiza mu nzira y'iteka ni rurerure, ni ukurerana, tugahozako guhanurana.

17. Eka n'ejø bundi, mwarumvise ko hari akarwi k'abasoda kafashwe kariko gategura imigumuko. Nta nkeka ko ivyo vyari gutuma haba umutekano muke mu gihugu, bigatuma imyiteguro y'amatora itagenda neza, bigaha impigi abipfuza kudusubiza muri za ntwaro mfatakibanza z'amagaburanyama mwiyamiriza mu matora y'2005, kandi mugiye gusezerera mu matora yo mu 2010.
18. Tuboneyeho gukengurukira inzego z'umutekano zavyifashemwo neza, zikabatesha mu mahoro n'umutekano, kubera ubwira, ubwittonzi n'ubukerebutsi bwazo. Ni zikomere ku muheto, zigume ziyambika umutamana ; ejo hahise si uyu munsi, ibintu vyarahindutse ; maze uwuwakije wese umuzimireko, uwurukarihije nawe rumumwe. Turasubiye gukebura intumva, kuko akataretse kaba gasema.
19. Turaremehsheje rero abarundi mwese. Ni mutekane, mugume ku bikorwa, murikanure, mwiyamirize uwo wese yozana ingendo idusubiza mw'ihumbi, ihereye mu gutoba amatora.
20. Ku bwacu, turasubiriye kubemerera icese ko ataco tutazokora kugira amatora agende neza, ku mugaragaro, muri demokarasi no mu mutekano ntangere.
21. Twizeye ko umurwi ujejwe gutunganya amatora CENI uriko urategura kwongereza ikiringo co kwiyandikisha, naburya hari aho rusansuma rwatanguye rutevy'e, kandi ubu abanyagihugu bakaba baronkejwe urundi rupapuro ruborohereza, bikagaragara ko bariko baritabira ico gikorwa ku bwinshi.
22. Turahamagariye rero abarundi mwese mwemerewe n'amategeko ngo muje kwiyandikisha, kugira ngo muronke ububasha bwo kuzotora indongozi. Mwim'e amatwi abababesha ngo amatora y'Umukuru w'ighugu yaraheze, canke ngo wiyanikishije uba ukuye Umukuru w'ighugu, canke ngo uzotoza karangamuntu. Ababbwira uko bashaka ntabe, dusubire mu ntwaro mfatakibanza z'amagaburanyama *m'aka jagaru*.

23. Gutora ni iteka, ni inguvu ku murundi, aho afata ingingo ati nkeneye guserukirwa canke kurongorwa na naka kubera ubutwari n'ubukerebutsi ndamuziko.
- Kugira ngo uronke ubwo burenganzira, ubanza kuja kwiyandikisha. Ntimwiyake rero iryo teka Barundi!! ~~muzosigara
muriuzga~~.
24. Ni co gituma tubasavye ngo musidukane n'iyonka, mugende harya bandikira, mwiyanidikishe mwese. Ntimuvyitiranye n'urusansuma ruheruka, aho abanditsi babasanga i muhira. Ubu ni mubasange harya bariko barandikira, kandi mubishiremwwo umwete, muhimirizanye ntihagire uwusiba.
25. Ku bw'ivyo, ku munsi wa mbere itariki 8 Ruhuhuma, turatanze akaruhuko kugira ngo tworohereze abakozi ba Leta bose kuja kwiyandikisha no guhimiriza incuti n'abagenzi ngo bitabire ico gikorwa.

**Barundi, Barundikazi,
Ncuti z'Uburundi,**

26. Mukurangiza twagira tusubire kubatera akamo ngo mubumbatire ubumwe mu ~~guhupurira~~ ku bikorwa rusangi, mu gusabikanya no mu kuyaga. Vyongeye twame tuyaga tuzirikana na ntaryo ko iragi ry'abiguze intahe y'ukwikukira rigaragarira mu civugo c'Uburundi : **Ubumwe- ibikorwa –amajambere.** Ubumwe buza imbere ya vyose, harimwo urukundo kagati y'abenegihugu, no gukunda igihugu ciza Imana yaduhaye nk'impetso ya twese abarundi.
27. ~~Muzosasagaza ubumwe, amahoro n'mutekano ni mwasonera
inzezo inwebwe nyene mwitoreye, mukazibungabunga,
ntidusubire mw'ihumbi nko mu 1993.~~
28. Turabipfurije rero kandi umusi mukuru mwiza w'ubumwe bw'abarundi, ubumwe atari ubwomekerano, ubumwe igihushane c'amacakubiri, ubumwe inkingi y'amahoro, **umutekano, demokarasi n'iterambere.**

**Imana ibahezagire,
Murakoze.**